



# Kattusseqatigiit Partiiat

05 marts 2010

UPA 2010/72

Inatsisartut suleriaasiata § 35-ia naapertorlugu matumuuna nassiuppara apeqquteqaat aallaavigalugu oqallinnissamat siunnersuut:

**Apeqquteqaat aallaavigalugu oqallisissiaq: Sanaartugassanik suliarinnittussarsiuussisarnermi tamakkiisumik neqeroortitsisarneq atorneqartillugu, tamakkiisumik neqeroortitsisarnermik tiguisup suliffeqarfiit mikinerit assigiinngisitsineqataqanngitsumik ilinniartuullit salliutillugit suliakkiisarnissaat pillugu oqallisissiaq**

(Inatsisartunut ilaasortaq Jakob Skade, Kattusseqatigiit Partiiat)

## **Tunngavilersuut:**

Sanaartugassanik sunilluunniit suliarinnittussarsiuussisoqartillugu aki tamakkiisoq, atorneqartillugu, akimik tamakkiisumik tiguisup nunaqavissut suliffeqarfiit mikinerit siullertut ilinniartuutillit salliutillugit isumaqatigiissutigineqartarnissaat isumaqarpugut Kattusseqatigiit Partiianiik ullumikkornit annertunerusumik inatsisitigut iluarsiivigineqartariaqartut.

Tamatumunnga tunngatillugu Kattusseqatigiit Partiianiik oqaatigerusupparput nunaqavissut suliffeqarfiutillit mikinerit annikkittuaraannartigut suliakkerneqartarnerat naammaginangilluinnarmat, taamaattumik suliffeqarfiit mikinerusut piginnaasaannut naapertuuttumik suliakkerneqartalernissaat aamma anguniarneqartariaqartoq isumaqarpugut.

Erseqqissarusupparput sanaartornermi neqerooruteqartitsisarnermi nunaqavissut pitsaanerusumik periarfissinneqartuarnissaat Kattusseqatigiit Partiianiik anguniaratsigu, aningaasat nunatsinni amerlanerpaat kaaviiartinneqartuarnissaat aamma qulakkeerumallugu.

Taamaattumik isumaqarpugut inersuarmi maani oqallisigineqartariaqartoq, qanoq iliornikkut tamanut naammaginartumik aaqqiisoqarsinnaanera anguneqaqqullugu, inatsisip qanoq iluarsiivigineqarneratigut inatsisartut naalakkersuisullu qanoq oqariartuuteqassanersut assut paaserusunnarpoq.

Taamatut naakkaluamik oqallisissiamik saqqummiussivunga.